

Pruma sentèda del nef Consei de l'ICL

L'Istitut Cultural Ladin ge à sport n chèder en segn de recognosciment e de ringraziament a Antone Pollam stat president. L Consei, vidà da la neva presidenta Lara Battisti, à rejonà ence di Stac Generai de la Mont.

En lunesc ai 24 de mé l'è stat la pruma sentèda del nef Consei de Aministrazion de l'Istitut Cultural ladin "majon di fascegn" vidà da la neva presidenta Lara Battisti.

Per l'ocajion la presidenta l'ha volù se troèr con i Conseieres e con dut l personal te Museo Ladin per fèr la prejentazions, se cognoscer mingol miec e pontèr via con i lurieres.

"Aane programà de se troar ence con la Comiscion culturèla – à dit la presidenta Battisti - ma dapò per costions de endrez no l'è stat possibol. Te Museo, olache l'era ence la procuradora del Comun general de Fascia e senatora Elena Testor, aon fat n moment de prejentazion e mingol de reflescion su le endesfide de l'Istitut per i egn che vegn. L'Istitut à volù amò n'outa ringraziar per so gran empegn e soa fona pascion l president che jia fora Antone Pollam, a el ge è stat sport n cader

de R. Decrestina del 1959 con su l Sela, grop che per el l'è semper stat n simbol: entorn l Sela se bina duc i Ladins de la Dolomites, el se à semper dat jù acioche nosc popul sie dut adum, donca chest cader l simbolisea benon so pensier e soa azion te chisc egn. Aon fat dapò duc ensema na raida te Museo e dò sion jic te Istitut per la pruma sentada ofiziala.

L nef Consei à aproà i prumes adempimenc

L prum pont a l'orden del di l'era la nomina del vize president, sun mia proponeta l'è stat lità duc a una Francesco Dellantonio Tasin. Apede el te Consei l'è Lodovica Dioli, Carlo Deluca, Andrea Rizzi e Marika Riz. Dapò aon tout dant i mudamenc al bilanz e la relazion illustrativa che l'è l pian de le attività di trei egn che

vegn. Te chesta ocajion l'è stat fat n aggiornament de le attività de l'ICL en particular de chele più emportante: l Volf, i archivies e i studies e le enrescide.

L'è stat rejonà ence di Stac Generai de la Mont percheche anter i temes sun chi che la Provincia à domanà de far na reflescion l'è la forma aministrativa, l ruol e l destin di Istitut culturalai.

En particolar te la scheda mendranzes vegn domanà "se l ruol di istituc de cultura l'è l presidie de la mendranza linguistica sul teritorie, co vegnela valutèda la possibilità che l control de chisc medemi passe da la Provincia ai Comuns o a la Comunitàdes de referiment?"

A chi pa la »governance« de l'ICL?

"Aon fat na reflescion sun chesta costion – à spiegà la presidenta

Battisti - ben segur l Consei l'è nef e l cogn amò se fèr ite. Sun chest se à jà palesà tant l veie Consei che la Comiscion culturèla con n document che è stat portà dant da Lodovica Dioli. La Comiscion se à enterogà sun che che se vel entener con la parola "control" e l'ha envià l Consei a individuar la posizion miora per garantir l bon andament de l'ICL. Gio peisse che sun chest ge vel far n ragionament con più calma. L'è vegnù fora enveze l gran besegn de troar prest na forma aministrativa più dinamica, per ge dar a l'Istitut chela autonomia che ge pemet de lurar delvers per arjonjer soe finalitè scientifiche e culturale. Ajache l'è n setor specialisà l'ha besegn de na forma aministrativa e prozedure che tegne cont de soe carateristiche. Prum de dut donca se cogn vardar de sburocratarisà l sistem e dapò de portar a ciasa i projec envié via

soraldut la mostra permanenta de la Gran Vera e l Volf, l dizionar ladin fascian. Da chest prum Consei é abù na bela imprescion, me à dat l'idea che l'è dut persone che vel se rejonar e se confrontar e che à a cher i fins de l'Istitut Cultural ladin."

Sodesfazion ence da man del diretor de l'ICL Fabio Chiocchetti: "Ades che l'è stat nominà l Consei podon jir inant con le attività che era restade cete e meter sù i finanziemenc aldò. Te Consei l'è stat descoret ence di Stac Generai de la Mont e l'è stat domanà che vegne fat n ragionament su la "governance" de l'Istitut ajache se rejonar de ge la passar a le Comunità de val. N passaje che, anter l'auter, no troa d'acort i Istitut de le mendranze mochen e cimbra. Emportant l'è che vegne garanti l'autonomia culturala e scientifica e che vegne prest slejierà la burocrazia." MCI



Lara Battisti ge spore l chèder a Antone Pollam en segn de ringraziament.



L Consei nef de l'Istitut Cultural Ladin con la presidenta Lara Battisti, l diretor Fabio Chiocchetti e i dependenc.